

**Anggota Umno Di Negeri Pembangkang Mesti Tumpu Menangi Kerusi Ditandingi  
Bernama  
15 November , 2011**

KUALA LUMPUR, 15 Nov (Bernama) -- Naib Presiden Umno Datuk Seri Mohd Shafie Apdal berkata anggota Umno di negeri-negeri yang ditadbir pakatan pembangkang perlu menumpukan perhatian untuk memenangi kerusi yang ditandingi.

Sambil mengingatkan anggota Umno di negeri berkenaan supaya tidak terlalu fokus menonjolkan diri sebagai calon Barisan Nasional (BN) bagi pilihan raya umum akan datang, beliau berkata tiada erti menjadi calon BN tetapi parti kalah di kawasan mereka.

"Selepas kita kalah, kita tidak akan ada wakil di kawasan itu kerana kita pentingkan diri. Ini masanya untuk kita bekerja, membantu, menjayakan agenda terbesar kita iaitu kesejahteraan negara," kata Mohd Shafie, yang juga Menteri Kemajuan Luar Bandar dan Wilayah, kepada pemberita selepas merasmikan Mesyuarat Penyelarasan Pembangunan Daerah Siri 2 2011 di sini hari ini.

Beliau berkata demikian ketika ditanya mengenai keghairahan segelintir anggota Umno di negeri yang dikuasai pembangkang menonjolkan diri untuk menjadi calon pilihan raya.

Mohd Shafie berkata secara umumnya, beliau berpuas hati dengan prestasi anggota Umno.

"Saya tahu mereka (anggota Umno) bekerja keras seperti yang ditonjolkan di Kelantan, Pulau Pinang. Macam-macam kaedah dan inovatif yang mereka buat. Ada gelombang merah dan di Selangor, jentera sedang bekerja kuat untuk memastikan negeri itu kembali ke tangan kita."

Seramai 300 pegawai daripada pelbagai agensi kerajaan menghadiri mesyuarat dua hari yang bertujuan mewujudkan kerjasama lebih rapat antara kementerian dan pejabat-pejabat daerah dan residen di seluruh Malaysia.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=626987>